

戌 1

642.

醫學源流論卷下

醫學源流論下卷目錄

治法

司天運氣論

醫道通治道論

五方異治論

病隨時運論

針灸失傳論

水病針法論

出奇制病論

治病緩急論

治病分合論

發汗不用燥藥論

病不可輕汗論

傷風難治論

攻補寒熱同用論

臨病人問所便論

治病不必顧忌論

病深非淺藥能治論

愈病有日期論

治病必考其驗否論

防微論

知病必先知症論

補藥可通融論

輕藥愈病論

腹內癰論

圍藥論

書論

附科

難經論

傷寒論

金匱論

脈經論

千金外臺論

活人書論

太素張論

婦科論

痘科論

附種痘說

幼科論

瘍科論

祝由科論

獸醫論

古今

四大家論

醫家論

醫學淵源論

考試醫學論

醫非人人可學論

名醫不可爲論

邪說陷溺論

涉獵醫書誤人論

病家論

醫者誤人無罪論

醫學源流論卷下

吳江徐靈胎洄溪著

男 熾鼎和校

司天運氣論

邪說之外。有欺人之學。有耳食之學。何謂欺人之學。好爲高談奇論。以駭人聽聞。或勦襲前人之語。以示淵博。彼亦自知其爲全然不解。但量他人亦莫之能深考也。此爲欺人之學。何謂耳食之學。或竊聽他人之說。或偶閱先古之書。略記數語。自信爲已得其秘。大言不慚。以此動衆。所謂道聽塗說是也。如近人所談司天運氣之類是矣。彼所謂

司天運氣者。以爲何氣司天。則是年民當何病。假如厥陰
司天。風氣主之。則是年之病。皆當作風治。此等議論。所謂
耳食也。蓋司天運氣之說。黃帝不過言天人相應之理。如
此。其應驗。先候于脉。凡遇少陰司天。則兩手寸口不應。厥
陰司天。則右寸不應。太陰司天。則左寸不應。若在泉。則尺
脉不應。亦如之。若脉不當其位。則病相反者死。此診脉之
一法也。至于病。則必觀是年歲氣。勝與不勝。如厥陰司天。
風淫所勝。民病心痛脇滿等症。倘是年風淫雖勝。而民另
生他病。則不得亦指爲風淫之病也。若是年風淫不勝。則

又不當從風治矣。經又云：相火之下，水氣乘之；水位之下，火氣承之。五氣之勝皆然。此乃亢則害，承乃制之理。即使果勝，亦有相尅者乘之，更與司天之氣相反矣。又云：初氣終三氣，天氣主之；勝之常也。四氣盡終氣，地氣主之；復之常也。有勝則復，無勝則否。則歲半以前屬司天，歲半以後又屬在泉。其中又有勝不勝之殊，其病更無定矣。又云：厥陰司天，左少陰，右太陽。謂之左間、右間，六氣皆有左右間。每間主六十日，是一歲之中復有六氣循環作主矣。其外又有南政北政之反，其位天符、歲會、三合之不齊，太過不

及之異氣欲辨明分晰終年不能盡其蘊當時聖人不過言天地之氣運行旋轉如此耳至于人之得病則豈能一一與之盡合一歲之中不許有一人生他病乎故內經治歲氣勝復亦不分所以得病之因總之見病治病如風淫于內則治以辛涼六氣皆有簡便易守之法又云治諸勝復寒者熱之熱者寒之溫者清之清者溫之無問其數以平爲期何等劃一凡運氣之道言其深者聖人有所不能知及施之實用則平正通達人人易曉但不若今之醫者所云何氣司天則生何病正與內經圓機活法相背耳

醫道通治道論

治身猶治天下也。天下之亂有由乎天者。有由乎人者。由乎天者。如夏商水旱之災是也。由乎人者。如歷代季世之變是也。而人之病有由乎先天者。有由乎後天者。由乎先天者。其人生而虛弱柔脆是也。由乎後天者。六淫之害七情之感是也。先天之病。非其人之善養與服大藥。不能免於天折。猶之天生之亂。非大聖大賢。不能平也。後天之病。乃風寒暑濕燥火之疾。所謂外患也。喜怒憂思悲驚恐之害。所謂內憂也。治外患者。以攻勝。四郊不靖。而還將出師。

速驅除之可也。臨辟雍而講禮樂。則敵在門矣。故邪氣未盡而輕用補者。使邪氣內入而亡治內傷者。以養勝綱紀。不正而崇儒講道。徐化導之可也。若在刑罰而嚴誅戮。則禍益深矣。故正氣不足而輕用攻者。使其正氣消盡而亡。然而大盛之世。不無玩民。故刑罰不廢。則補中之攻也。然使以小寇而遽起戎兵。是擾民矣。故補中之攻不可過也。征誅之年。亦修內政。故教養不弛。則攻中之補也。然以戎首而稍存姑息。則養寇矣。故攻中之補不可誤也。天下大事。以天下全力。之則事不墮。天下小事。以一人從容處。

之則事不擾。患大病以大藥制之。則病氣無餘。患小病以小方處之。則正氣不傷。然而施治有時。先後有序。大小有方。輕重有度。疎密有數。純而不雜。整而不亂。所用之藥。各得其性。則器使之道。所處之方。各得其理。則調度之法。能卽小以喻大。誰謂良醫之法。不可通於良相也。

五方異治論

人稟天地之氣以生。故其氣體隨地不同。西北之人氣深而厚。凡受風寒。難于透出。宜用疎通重劑。東南之人氣浮而薄。凡遇風寒。易于疎洩。宜用疎通輕劑。又西北地寒。當用溫熱之藥。然或有邪縕于中。而內反甚熱。則用辛寒爲宜。東南地溫。當用清涼之品。然或有氣隨邪散。則易于亡陽。又當用辛溫爲宜。至交廣之地。則汗出無度。亡陽尤易。附桂爲常用之品。若中州之卑濕。山陝之高燥。皆當隨地制宜。故入其境。必問水土風俗。而細調之。不但各府各別。

卽一縣之中風氣亦有迥殊者。并有所產之物所出之泉。皆能致病。土人皆有極效之方。皆宜詳審。訪察。若恃已之能。執已之見。治竟無功。反爲土人所笑矣。

湖州長興縣有合溪。小兒飲此水。則腹中生痞。土人治法。用線掛頸。以兩頭按乳頭上剪斷。卽將此線掛轉。將兩頭向背脊上。一併拽齊。線頭盡處。將墨點記脊上。用艾灸之。或三壯。或之壯。卽消。永不復發。服藥無效。

病隨國運論

天地之氣運數百年一更易而國家之氣運亦應之上古
無論卽以近代言如宋之末造中原失陷主弱臣弛張潔
古李東垣草立方皆以補中宮健脾胃用剛燥扶陽之藥
爲主局方亦然至於明季主暗臣專膏澤不下於民故丹
溪以下諸醫皆以補陰益下爲主至我

本朝運當極隆之會

聖聖相承大權獨攬朝綱整肅惠澤旁流此陽盛于上之
明徵也又冠飾失纓口燔烟草五行雜火獨旺故其爲病

皆屬盛陽上越之症數十年前雲間老醫知此義者往往專以芩連知柏挽回誤投溫補之人應手奇效此寔與運氣相符近人不知此理非惟不能隨症施治并執寧過溫熱毋過寒冷之說偏於溫熱又多矯枉過正之論如中暑一症或有伏陰在內者當用大順散理中湯此乃千中之一今則不論何人凡屬中暑皆用理中等湯我日覩七竅皆裂而死者不可勝數至于託言祖述東垣用蒼朮等燥藥者舉國皆然此等惡習皆由不知天時國運之理誤引舊說以害人也故古人云不知天地人者不可以爲醫